



# Khutba Eid-ul-Adha

HADHRAT AMIR'UL MUMINEEN MUHYI-UD-DIN

*Munir Ahmad Azim*

24 Septembre 2015  
(10 Dhul-Hijjah 1436 Hijri)

(Résumé Khutba Eid)

*Eid Mubarak !*

*Après ki li fine souhaite « Assalamoulaikum Warahmatullah Wabarakaatouhou » et EID MUBARAK à tous so bane disciples (et tous bane musulmans) entier le monde – en mentionnant bane l'iles avoisinants, l'Inde, Kerala, Trinidad et Tobago etc. – Hazrat Khalifatullah (atba) fine commence so Khutba Eid avec Tashahhud, Ta'uz, Surah Al Fatiha, Surah Al-Hajj (Ch.22) Verset 35-38 ; et ensuite li fine dire:*

وَبِكُلِّ أُمَّةٍ جَعَلْنَا مَنْسَكًا لِيَذْكُرُوا اسْمَ اللَّهِ عَلَىٰ مَا رَزَقَهُمْ مِنْ بَهِيمَةِ الْأَنْعَامِ ۗ فَإِلَهُكُمْ  
إِلَهُ وَاحِدٌ فَلَهُ أَسْلِمُوا ۗ وَبَشِّرِ الْمُحْسِنِينَ ۝ الَّذِينَ إِذَا ذُكِرَ اللَّهُ وَجِلَّتْ قُلُوبُهُمْ وَالصَّابِرِينَ  
عَلَىٰ مَا أَصَابَهُمُ وَالْمُقِيمِي الصَّلَاةِ ۗ وَمِمَّا رَزَقْنَاهُمْ يُنْفِقُونَ ۝ وَالْبُدْنَ جَعَلْنَاهَا لَكُمْ  
مِنْ شَعَائِرِ اللَّهِ لَكُمْ فِيهَا خَيْرٌ ۗ فَادْكُرُوا اسْمَ اللَّهِ عَلَيْهَا صَوَافٍ ۗ فَإِذَا وَجَبَتْ جُنُوبُهَا  
فَكُلُوا مِنْهَا وَأَطْعَمُوا الْقَانِعَ وَالْمُعْتَرَّ ۗ كَذَلِكَ سَخَّرْنَاهَا لَكُمْ لَعَلَّكُمْ تَشْكُرُونَ ۝

لَنْ يَنْتَازَ اللَّهُ حُومَهَا وَلَا دِمَآؤَهَا وَلَكِنَّ يَنْتَازُهُ التَّقْوَى مِنْكُمْ ط كَذَلِكَ سَخَّرَهَا لَكُمْ

لِتُكَبِّرُوا اللَّهَ عَلَى مَا هَدَاكُمْ ط وَبَشِّرِ الْمُحْسِنِينَ

Wali-kulli 'ummatin ja-'alnaa man sakal-liyazkurus-mallaahi 'alaa maa razaqahum-mim-bahiimatil-'an 'aam. Fa 'ilaahukum 'Ilaahuww-Waahidun falahuuu 'aslimuu: wa bash-shiril-Mukhbitiin 'Allaziina 'izaa zukirallaahu wajilat quluubuhum wal-muqiimis-Salaati wa mimmaa razaqnaahum yunfiquun. Wal-budna ja-'alnaaha a lakum-min Sha-'aaa 'irillaahi lakum fiihaa khayr: fazkurus- mallaahi 'alayhaa sawaaff: fa 'izaa wajabat junuubuhaa fakuluu minhaa wa 'at-'imluqaani-'a wal-mu'-tarr: kazaalika sakh-kharanaaha lakum la-'allakum tashkuruun. Layy-yanaalallaaha luhuu-muhaa wa laa dimaaa 'uhaa wa laakiyy-yanaaluhut Taqwaa minkum; kazaalika sakh-kharahaa lakum litukabiirul 'alaa maa hadaakum: wa bashshiril-Muhsiniin.

*Pou sak communauté, Nous fine désigne ene rite de sacrifice, afin ki zot prononce le nom d'Allah lors sa zanimo de sacrifice ki fine attribué à zot. Zot Bondié Li en vérité ene Dieu Unique. Soumette zot donc à Li. Et donne bon nouvel à bane ki soumette (humilié) zot, bane ki zot lé cœur frissonner kan nom Allah prononcé, bane ki endure saki arrive zot et bane ki accomplir Salaat (la prière) et dépense de saki Nous fine accorde zot. Nous fine désigne bane chameau (et bane bétaaye) bien portant pou accomplir certain rites sacré à Allah. Dans zotte ena ene bienfait pou ou. Alor prononce nom Allah lors zot kan fine attache zot la patte, prêt pou sacrifié. Ensuite kan zot en bas lors zot flanc, mange ene partie et donne à manger bane mendiants et bane misère. Comme sa Nous fine mette zot (bane chameau) à ou service afin qui ou montrer reconnaissance. Zotte la viande et zotte disang pas pou alle jusqu'à Allah, mais c'est ou piété ki pou alle jusqu'à Li. Li fine aussi mette zotte à ou service afin ki ou glorifier Allah pou bon chemin qui Li fine montrer ou. Donne sa bon nouvel là à bane qui faire dibien.*

Bane grand conseils ki fine mentionner dans sa bane versets là, li appliquer lors sak aspé de la vie humaine. Premièrement fine enseigne signification de sacrifice. Fine dire ki ou entièrement dépanne lors sa bane zanimo (bétaaye) avec quatre la pattes là. Bane zanimo avec laquelle ou gagne toute sorte de provisions. Et ena bane les autres avantages ki lier avec sa bane zanimo quatre la pattes là pou facilite ou la vie. C'est lors sa même zanimo ki ou voyager.

En fait premièrement le mot « *Anaam* » applique lors bane chameaux. Et parmi bane zanimu quatre la pattes ena autant avantages ki ena dans bane chameaux, dans aucaine les autres péna autant avantages. Donc, le mot « *Anaam* » applique parfaitement et premièrement lors chameaux.

Donc kan ou voyager ; ou mette ou bane bagages lors là et kan dans désert ou pé mort de soif et péna nannié à boire, bé c'est chameaux même ki vine à ou secours, parceki kan coupe chameaux là, ena ene de l'eau ki gagner de li, ki connecter avec so garde manger et dans sa moment critique là, bane dimoune boire sa de l'eau là. Donc c'est de chameaux même ki gagne sa dernier support de la vie là. Donc le mot « *Anaam* » servi principalement pou sa bane chameaux là. Et le résumé de tout sa bane sacrifices ki pé mentionner là, li comme suite, ki tout bane zaffaires de provisions ki zot ti gagner pou zot survie, c'est de sa bane zanimu (bétaaye) là ki zot ti pé gagne sa, et maintenant c'est même zanimu (bétaaye) ki ou pé alle sacrifier. Li couma dire ou pé sacrifier tout ou la vie pou Allah. Mais ou péna aucaine supériorité lors sa bane bétaaye là. Parceki c'est le même Allah, ki ou Allah aussi et zot Allah aussi.

Donc prononce le nom d'Allah et sacrifier sa bane zanimu là pou la cause d'Allah. Li couma dire ou pé passe couteau lors tout ou bane moyens de provision de ou la vie. Et sa c'est le dernier et pli haut signification de sacrifice ki sa verset Quran là enseigne nous. C'est-à-dire, ene zaffaire lors laquelle tout le temps ou la vie fine dépanne, ou pé sacrifier li, pou la cause d'Allah. Non pas pou présente so la viande devant Allah; Non. Au contraire la viande là pou vine à ou service même. Mais kan ou faire sacrifice là ou envie dire Allah, ki « *Nous prêt pou sacrifier tout pou Toi* ». Ensuite Allah dire soumette à Allah, ene Allah ki fine faire sa zanimu ki ou pé sacrifier là impuissant devant ou. Kan ou pé sacrifier bane zanimu là, bé sa bizin faire ou porte attention lors sacrifices de ou propre être. Ou bizin conner ki sa zanimu là, ki tout le temps li fine présent pou ou survie et maintenant comme ene signe de ou sacrifice, c'est sa même zanimu ki ou pé sacrifier. Bé l'objectif de sa sacrifice là, c'est ki ou aussi ou bizin reste toujours prêt à sacrifier ou pou la cause d'Allah pareil couma sa zanimu là li impuissant devant ou. De sorte ki si zamais ene l'époque vini kot bizin sacrifier ou même pou la cause d'Allah, bé ou aussi, ou montrer pli grand patience ki sa bane zanimu impuissant là montrer.

Ensuite Allah dire annonce la bonne nouvelle à bane ki humbles. C'est-à-dire ou bizin apprane humilité avec sa bane zanimu impuissant là et ou bizin faire preuve de plis humilité ki sa. Ou bizin présente tout devant Allah et là aussi ou bizin péna aucaine l'arrogance, ou bizin soumette avec toute humilité et là-dans même ki ena le plaisir d'Allah.

Maintenant guette ene coup couma fine tourne sa sujet de sacrifice de bane zanimò là et fine amène li lors sacrifices de bane *Insaan* (dimounes) Allah dire : « *bane vrai Momeneen (croyants) ki faire bane sacrifices pou la cause d'Allah, dès ki zot tane le nom d'Allah, bé zot le cœur rempli de crainte d'Allah, zot lé cœur trembler et zot endure avec patience tout céki traverse lors zot pou la cause d'Allah* ».

C'est bane dimoune ki fine fini trouver couma bane créatures ki pli bas ki nous fine sacrifier tout pou nous et c'est Allah même ki ti fine créer sa bane zanimò là pou nous et fine donne nous le droit pou sacrifier zot en prononçant le nom d'Allah. Sacrifier zot avec la permission d'Allah. Donc ki qualité ingratitude, ki qualité la honte pou été de nous part ki si Allah faire appel à nous pou bane sacrifices et ki nous pas réponde présent ! Donc, Allah pé dire ki sa bane appels là pou bientôt arriver, alors donne la bonne nouvelle à bane ki humbles. Zot vine tellement humbles ki kan zot tane le nom d'Allah, zot lé cœur rempli avec la crainte et zot montré ene l'exemple de patience pou tout céki zot endurer pou la cause d'Allah. Ensuite Allah dire c'est bane dimounes ki faire *Ibaadat*, ki établi le *Salaat* et de céki Nous fine donne zot, zot dépenser de dans.

Donc, sa c'est le sujet ki ena ene bél lien avec le Hajj. Kan Hazrat Ibrahim (as) ti mette couteau lors licou de so garçon bien-aimé, Ismael (as) bé li fine présente ene tel excellent exemple ki fine enseigne nous la philosophie de bane zanimò. Et fine dire ki ene tel l'époque pou vini kot ou pou bizin présente et sacrifier ou bane zenfants bien-aimé pou la cause d'Allah. Pareil couma maintenant ou pé mette couteau lors licou de sa bane zanimò là. Mais là-bas fine ena ene différence. Là-bas, Allah fine accepter l'esprit de sacrifice là et pas fine bizin sacrifier sa le corps physique là.

Donc, dans sa verset Quran là Allah pé dire ki zot passe couteau lors licou de bane zanimò ki provide zot tout. Mais dans ene lotte verset, Allah dire ki ni di sang là et ni sa la viande là arrive kot Allah. C'est seulement ou *Taqwa* ki arrive jusqu'à Allah. C'est la crainte d'Allah. Donc dans le premier verset là, kan Allah ti pé mentionner ki c'est bane dimounes ki dès ki zot tane le nom d'Allah, bé zot lé cœur rempli de crainte, li veut dire ki avec sa bane sacrifices ki zot faire là zot *Taqwa* augmenter. Et c'est zot *Taqwa* même ki digne d'être accepter de côté d'Allah. Parceki c'est bane dimounes ki fine sacrifier tout pour la cause d'Allah et zot toujours prêt pou sacrifier pliss ki sa et sacrifier même zot propre être pou gagne le plaisir d'Allah. Sa c'est le sujet ki fine arrive lors so complétion dans sa l'époque là avec Hazrat Ibrahim (as). Et kan Hazrat Ibrahim (as) fine parré pou passe sa couteau là lors licou de so garçon Ismael, bé l'état du cœur de sa papa là et l'état de sa garçon là, li ene zaffaire difficile à raconter.

Zamais fine arrive ene tel zaffaire dans l'histoire. Papa là fine dire, « Ô mo garçon, Allah fine donne moi l'instruction pou ki mo faire toi Zaba. Mo sacrifié toi. » Garçon là fine réponde : « Ô mo papa bien-aimé, faire exactement couma Allah fine dire toi, et Insha-Allah to pou trouve moi parmi bane ki faire Sabr. »

Donc kan dans premier verset là Allah ti mentionne bane ki prend Sabr, c'est sa même patience ki le garçon de Hazrat Ibrahim (as) fine montrer à l'heure de sa sacrifice là. C'est sa même ki Hazrat Ismael (as) ti fine dire ki « Insha-Allah to pou trouve moi parmi bane ki prend patience. »

Donc le sujet de sacrifice dans le chemin d'Allah ena tellement ene profond lien avec la patience, ki si péna patience, bé autant même sacrifice là aussi pou alle dans vide. Si Hazrat Ismael (as) pas ti dire avec full sincérité et avec fidélité ki Insha-Allah to pou trouve moi parmi bane ki faire Sabr, si li pas ti dire sa, bé sa jour là même la signification de sacrifice ti pou fini là-bas même. Et l'èrlà le monde ti pou reste privé de la réalité de sacrifice. C'est sa sujet de patience là même ki fine continué pli devant et tellement avec l'éclat dans l'époque de Nabi Kareem Muhammad (saw) ki aucaine part, ni dans l'époque de aucaine les autres prophète ou pas gagne bane tel l'exemples. La différence c'est seulement sa ki kan Allah fine guette le cœur de Hazrat Ibrahim (as) et fine guette so l'esprit de sacrifice, bé li fine sappe li de sa action de sacrifier so garçon là.

Mo espérer ki sakaine d'entre nous réfléchi lors le grand sacrifice et l'esprit de sacrifice de Hazrat Ibrahim (as) et Hazrat Ismael (as) pou ki sakaine d'entre nous tire ene leçon là-dans. Nous bizin faire *duah* ki si zamais nous aussi nous bizin présente bane sacrifices, bé volontairement et avec lé cœur content nous pou vine en avant pou présente sa bane sacrifices la. *Insha-Allah. Ameen. Eid-ul-Adha Mubarak !*